

Mirando atras riba loke a pasa na eleccion di Reina

E BERDAD LOKE A PASA RIBA STAGE DI REINA DI CARNAVAL

ORANJESTAD(AAN)--
E sucesonan entorno e eleccion di Reina di Carnaval ta un di e desaroyonan mas comenta na e momentonan aki. E tabata e topico di fin di siman di Carnaval. Tras di e desaroyo aki ta sconde sin embargo un gran berdad.

LOKE
PUBLICO
A MIRA

Kico a socede? Ariba stage tin para e Promer Ministro di Aruba cu ta representa e persona cu mester carga tur respet di ciudadanonan. Hunto cune e Presidente di SAC cu ta e maximo autoridad di celebracion di Carnaval. Tin e candidatanan cu hunto cu nan sponsornan a hinca tur nan esfuerzonan pa participacion na un competencia cu mester tabata sano. Tabata tin un hurado cu mester a dicidi y tabata tin un Pueblo den stadion y na cas en espera di e decision di hurado. Prins y Pancho a dicidi pa nan mes y no a saca esun cu a sali pero otro persona.

Kico e resultado tabata? E candidata inocente a bira e victima di henter e suceso. Loke el a pasa aden e anochi

ningun hende lo por describi ni comprende siquiera. Esun cu a sali no a sali cu e triunfo cu e mester a sinti pasobra ya su gozo a worde kibra. Un certamen a basha abao y turistanan por a tuma nota di un libertinahe total caminda nan a kere cu ta na algo serio nan ta participa.

Esaki ta e sucesonan cu generalmente ta worde mira.

RESPECT PA
VEREDICTO
A CABA

Pero tras di henter e desaroyo aki tabata tin otro factornan tambe pa cual a bin ta adverti pa tanto tempo. Na promer lugar a keda demostra cu e Prins y Pancho no tabata tin ningun respet pa e presencia di Promer Ministro. Nan no a mira den dje e representante electo maximo di un pais. Si realmente tabata tin respet na e momento pa e Promer Ministro hamas e Prins y Pancho lo a haci loke nan a haci. Cuanto biaha no a worde adverti cu Promer Ministro ta kita for di su autoridad cu su actuacionnan? Cuanto biaha no a worde adverti pa e mensahe negativo cu Gobierno ta transmiti?

Den presencia directo di Promer Ministro e Prins y Pancho a pone e decision di e hurado (e hueznan di un

certamen) un banda. Con nan por a haci algo asina? Pa esaki a socede cierto mentalidad mester ta reina. Entre otro cu un veredicto di Huez por worde ataca y no merece respet manera ta keda demostra na tanto ocasion dor di propio gobernantenan.

CORUPCION
A SUBI
STAGE

E Prins y Pancho a actua for di regla y a comete un acto di corrupcion cu segun nan tabata un protesta contra loke por tabata corrupcion pasobra pa asina tanto aña caba certamen di reinanan ta bay acompaña pa tono di duda den su legalidad.

E actuacion corrupto di Prins y Pancho ta solamente un di e hopi actonan di corrupcion cu ta socede den comunidad cu constantemente a siña biba cu actonan di corrupcion. Na fin di aña un sindicato a muestra con Gobierno ta sostene corrupcion y cuanto biaha no a worde muestra ariba actonan di corrupcion cerca Ministronan y miembronan di coalicion sin cu nada a socede? Sin embargo un mentalidad permisivo a worde permiti y dilanti Promer Ministro un acto di corrupcion a worde cometi.

Milo Croes como Presi-

dente di SAC a haci loke Nelson Oduber no a haci como Promer Ministro: el a descalifica esnan cu a comete corrupcion y a baha nan for di nan puesto.

DOLOR DI
E OTRO
NO TA
CONTA

E ora e Prins y Pancho a haci loke ta bira normal den nos comunidad: nan a comete un acto malo. Si nan tabata pensa cu tabata tin algo cu no ta cuadra cu e eleccion nan mester a adverti publico y no dicidi ariba nan mes cu nan ta usa un persona pa muestra nan protesta.

Cuanto biaha caba DIARIO y hopi hende pre-ocupa den comunidad a puntra cuanto un hende bal ainda y cuanto su sentimentonan costa? Ariba stage a mira con e Reina di Santa Cruz a worde usa dor di Prins y Pancho pa alcanza loke nan kier a alcanza. No a tene cuenta cu su dolor ni cu su sentimentonan.

Prins y Pancho a sigui loke ta pasa den comunidad tambe caminda Gobierno ta persigui inocentenan y usa nan sin mira cuanto dolor Gobierno ta provoca y sin tene cuenta cu nan sentimentonan ni cu e resultado cu e accion di Gobierno lo tin pa nan.

ACUSA
OTRO
INHUSTAMENTE

Mester mira tambe e reaccion di Prins y Pancho. Loke nan a haci no tabata tin hustificacion. Pero e siguiente dia nan a bay tene un rueda di prensa pa bisa cu ta como protesta contra Milo nan a hacie.

Cu cierto asuntonan di Carnaval ta worde cuestiona pa hopi tempo ta un hecho. Pero na e momento e Prins y Pancho no tabata tin ningun prueba cu tabata tin un eleccion cu no ta cuadra cu normanan. Sin embargo nan a bay basha Milo abao pa nan

por hustifica nan accion.

Atrobe ta mira e mentalidad di basha culpa ariba otro. Scuchando e Prins y Pancho papia na radio mester a recorda con algun sima pasa Promer Ministro y otro miembronan di su partido tabata trata di splica Pueblo cu ta AVP a corta tubonan di WEB por ehemplo.

Ta tristo pa bisa pero tabata tin mester di un Carnaval pa muestra Pueblo con leon a yega cu e mentalidad nobo cu a worde crea.

Corupcion den bista di tur hende y buscando hustificacion pa corrupcion dor di basha otro abao. Falta di respet pa hurado (Huez). Falta di respet pa e funcion di gobernante (Promer Ministro). Falta di respet pa autoridad (SAC) y falta di respet pa Pueblo.

Mas ainda falta di respet pa ser humano (e Reina di Santa Cruz pero tambe esun di Tivoli) y loke un ser humano ta sinti ora e worde usa den wega sushi.

LOKE MILO
A SIÑA
NEL ODUBER

E loke a pasa ariba escenario dia di eleccion di Reina tabata un spiel cu a worde poni dilanti cara di gubernacion pa nan contempla e mentalidad nobo cu a worde crea na Aruba y cu a culmina den celebracion di Carnaval. Den vista di mundo (hurado y bishitantenan extranhero) e imagen di Aruba como pais di integridad a worde poni na duda manera tanto accion na nivel halto ta ocasiona pa Aruba tambe.

Mester conclui cu Milo a siña Promer Ministro Oduber un les: si bo tin autoridad bo mester descalifica esun cu no ta sirbi. Aunke esaki encera cu mañan nan por trata di saca bo puitonan for di macuto. Esey ta conta pa Carnaval y esey ta conta pa Gubernacion.

Ta tristo cu tabata tin mester di Carnaval pa presenta e berdad cu tanto biaha ta adverti pe na Aruba.

BJS

MARCH SPECIALS!
15% CASH DISCOUNT!

" Rubbermaid "
Microwave Articles
8 Pcs. Kitchen
Ensembles
Party Sets
4 Pcs. Cannister Set
Hair Dryer
Fish Tape (Trek Veer)
Horse Care Supplies
Mail Boxes
Nozzles & Sprinklers
Hose Reels

BRENCHIE'S

Home Center/Annex
O'Stad & San Nicolas
" Bottom - Line Prices "

AMSTEL BEER

**e cerbez
di Carnaval**

SUPER - FACIL !

Bloo, un tableta re-
solvente, ta juda
tene bo toilet
LIMPI I FRESCU!

Bloo

openibel: Blue Spruce, Fresh Evergreen y Lavender

TELEFONAN DI DIARIO
22207-26747-35026-35023